

# Kemampuan seluruh ahli capai Visi Komuniti ASEAN 2045

BERITA HARIAN

27 MAY 2025

m/s: 3

**Kuala Lumpur:** Deklarasi Kuala Lumpur yang dimeterai semalam akan menjadi pemandu ke arah mencapai Visi Komuniti ASEAN 2045 yang diwujudkan dengan penuh keazaman dan kepercayaan bersama untuk menjamin masa depan lebih baik kepada generasi akan datang.

Perdana Menteri selaku Pengerusi ASEAN 2025, Datuk Seri Anwar Ibrahim, berkata masa depan yang dicari ini mesti bersandarkan kepada asas kemampuan dan keterangkuman seluruh anggotanya.

“Integrasi ASEAN mesti benar-benar berpaksikan rakyat. Ini bermakna menutup jurang pembangunan, meningkatkan taraf hidup dan melabur dalam semangat kemanusiaan dan potensi semua rakyat kita.

“Marilah kita bergerak ke hadapan dengan kejelasan dalam visi kita, kemantapan dalam tujuan kita dan perpaduan dalam kehendak kita untuk membina ASEAN yang kita berhutang kepada generasi akan datang,” katanya dalam ucapan sempena majlis pemetraian Deklarasi Kuala Lumpur

mengenai ASEAN 2045: *Our Shared Future* di sini semalam.

Visi Komuniti ASEAN 2045 yang bermatlamat membangunkan sebuah pusat pertumbuhan utama di rantau Indo-Pasifik menjelang 2045, menggariskan enam dokumen penting termasuk pelan strategik bagi tiga tunjang komuniti ASEAN serta pelan keterhubungan serantau.

Ia juga akan menyentuh 500 langkah strategik yang akan diterjemahkan kepada program kerja konkrit oleh badan sektor ASEAN.

Mengulas lanjut, Anwar berkata, pada dekad lalu rantau ini melancarkan Wawasan Komuniti ASEAN 2025 yang menegaskan semula peranan negara anggota itu sebagai wilayah yang stabil dan pusat graviti ekonomi yang semakin meningkat.

Namun hari ini katanya, arahan antarabangsa yang mencetuskan ketegangan geopolitik, pemecahan ekonomi, iklim dan gangguan teknologi sedang menguji rantau ini.

“Tahun-tahun mendatang akan ditentukan revolusi dalam tekno-

logi dan sains.

“Keupayaan kita untuk memimpin dalam kecerdasan buatan (AI), inovasi digital, ekonomi hijau dan biru (maritim) akan menentukan bukan saja kemakmuran, tetapi juga perpaduan kita.

“Namun teknologi yang sama ini membawa risiko. Jika tidak dikawal, ia mungkin melebarkan jurang ketidaksamaan, jejas kehidupan dan melanggar aturan.

“Kita bukan saja mesti menerima inovasi, kita mesti belajar untuk mentadbirnya bersama dan dengan berhati-hati,” katanya.